

Section théâtre : 1 conteur-2 acteurs : Louis et P'tit Louis

## CHEZ MAC-LOUIS

Ed pus des mos in è chi tout in ameur, sul' plach d'armes d'avant l' fontain' sins ieaux, l' magasin d'loques l'pus connu Valinchiennes y'a disparu dins un chantier inimaginap' ! Tout l'étach étot maintenu par des piliers d' soutènemint et quand in jetot s' noeul in passant dins l' rez de chaussée, in se s' rot cru arvenu en 44 lors du bombardemint del' vill'.

Mais qu'est-ce-qu'in va bein chi fair' ? L'grand Louis i d'minde à sin garchon qui dot savoir car comme tous l' zétudiants i fréquente l' centre ville.

Louis - ed quoè ? un restaurant américain ? mais pour nous quo fair' ?

P'tit Louis – pour minger des sandwichs pa, qu'in nous sert dins ein' tiote boît' avec un dessert glacé dins in verr'en carton qu'in bot al' paill'.

Louis - mais qu'elle idée tout d' mînme de s' déringer au restaurant à ch' t' heure pou mîer un briquet qu'in a à s'mason ! et ch'est pou du pain et deul' limonate qu'in a transtormé c' bell' façade en eine grosse merinque ? un catiau d'chantilly ? vandales !

P'tit Louis – In y fait aussi des frites ! mais congelées.....

Louis - Tais-teu malheureux, n'viens pas chi attirer l'mauvais sort. T' mère elle pourrot t'intindre et suif' l' mode américaine ! Rien que d'y penser j'in tranne jusqu'à mes ortels. Mais té m' donn' là ein idée garchon ! mi aussi j'peux fair' m' valise avec Germain' et partir au pays des gratte-ciel. I vont d'avoir d' lexotisme a vec les ch'tis ! Mi aussi j'ouvrirai un tiot troquet et in f'ra connaîtr' not' ratatoul al' zharicots, not' soupe à rassacache, not' bifteack frites à l'al, l' flamich' au Maroilles, nos tart's au chuqu' et au papin. Enfin tous les jours pindant un mos in pourra canger d'menus. A nous d' fair' l' fier-cul ! J' vos d'ici l'enseign' en lett'es lumineusses : **CHEZ MAC LOUIS**

P'tit louis – Allons pa, n' t'énerf' pas. Mi j'peux t' dir' qu'au bout d'un mos là-vau, té s'rot capabl' d' t'invinter des gardins où poussent des arpes à frites et des terrils d'ratons !